

東

華

錄

臣王先謙敬編

臣周澗蕃恭校

康熙二十二年癸亥春正月乙卯召大學士九卿翰詹科道等官賜上元節宴於乾清宮宴畢諸臣謝恩出復召大學士明珠學士張玉書牛紐陳廷敬諭曰今日因上元令節特賜卿等宴以示優眷尙有馴馬內幣令於掖門外頒賜朕念諸臣中有年力衰老不能久坐者故夜漏未闌遂爾罷譙恐口諭未悉朕懷茲書諭旨一道示卿等可傳諸臣知之諭曰從來君臣之分雖甚尊嚴上下之情貴相浹洽嘗觀唐宋盛時堂廉不隔以成交泰之治卿等朝夕勤勞出入奏對朕心時切嘉念今將內廄馬匹及滇中新到馬匹擇其馴良易於控御者頒賜卿等加以內紵卿等其各承受示

朕優眷之懷大學士各表裏六疋馬一疋尙書左都御史各表裏五疋馬一疋侍郎學士副都御史各表裏四疋馬一匹通政使大理寺卿詹事日講官各表裏三疋科道官各表裏二疋○己未

上幸演武場閱射○壬戌敘平定察哈爾功以札魯特二等台吉

根都西希布爲輔國公○癸亥以席蘭泰爲盛京禮部侍郎由通政使

○左都御史徐元文奏三年大計藩臬兩司並令赴京朝覲蓋

將以閭閻之利病上陳而 皇上因以鑒察其才能爲進退之地

舊例藩臬入覲俱許條奏地方事宜但僅得由通政司投遞引見

後卽行臣請各省藩臬朝見之後卽將所屬地方應行各事各具本

面奏 皇上鑒其才具優劣於察吏用人之典不爲無補下部確

議○丁卯以徐旭齡爲山東巡撫由左僉都御史遷○禮部尙書帥顏保

以疾乞休允之○命翰林院侍讀明圖爲正使編修孫卓爲副使

往封安南國王嗣黎維正爲安南國王○己巳 上幸南苑行圍

○以平比郡王羅可鐸之子納爾都襲平郡王○先是安南國王黎維禧故因廣西用兵未經遣祭其後王嗣黎維禔復故至是來告哀遣翰林院侍讀鄂赫爲正使禮部郎中周燦爲副使前往諭祭○吏部議覆左都御史徐元文奏藩臬入覲例有條陳請敕令面奏應如所請其代藩臬入覲道員亦照藩臬面奏條陳事宜得旨朝覲各官面奏時令通政使司堂官引奏科道官侍班○壬申 上還宮○以四川建昌永甯夔州用兵免前年額賦○是月免廣西平樂藤縣水災賦十之三

二月癸酉朔翰林院奏康熙二十一年起居注冊應照例會同內閣諸臣看封貯庫 上日記注起居事迹將以垂之史冊所關甚要或在朕前原未陳奏乃在外妄稱如何陳奏如何奉旨私自緣

飾開寫送起居注館且每日止該直官二員記注或因與己相善特美其辭與己不相善故抑其辭皆未可知起居注官能必其皆君子乎記注冊朕不欲親閱朕所行政事卽不記注其善與否自有天下人記之爾等傳諭九卿詹事科道等官會議應作何公看如以所無之事誣飾記注者將嚴懲焉○以喀爾圖爲刑部尙書

由左都御史遷

○大學士明珠等奏奉 上諭以起居注檔冊事問九卿

僉云起居注皆記載機密事宜垂諸史冊所關重大臣等不敢閱且滿漢起居注官共二十二員直日記載俱係公同校閱凡九卿官員所奏之事無私自繕寫送進史館記注之例如有繕寫送進者起居注衙門必進呈 御覽方敢入冊向來定例如此得旨著仍照舊例○乙亥議政王大臣等會議貝子章泰身領大兵在岳州相拒未能前進坐延歲月應議罪但恢復岳州雲南等城在歸

化寺勦賊功罪相抵得旨所議章奏功罪相抵甚當其歸化寺殺

賊恢復雲南省城之功仍著議敘○丁丑調介山爲禮部尙書

由吏部

部○己卯以禧佛爲左都御史

由吏部右侍郎遷

○敘勦平川東逆賊功

加四川陝西總督哈占兵部尙書銜○辛巳 上御經筵○壬午

山東巡撫徐旭齡陛辭諭曰爾任言官時素稱能言凡民生利弊言之殆盡今簡爾巡撫一方必實心任事言行相符斯不負朕委任至意○癸未諭大學士等閱朝覲布按各官條奏於治民弭盜非不鋪張累牘然如何綏戢則盜源可靖如何儲備則凶歲無饑未見確實敷陳裨於實用惟麻爾圖所稱陝西積欠錢糧應分四年帶徵其言頗當朕軫念陝西地方連年寇警輓運艱苦每欲蠲除宿負以兵革未息時方需餉未及豁免冀佳育言江邊蘆田坍塌無常應五年一丈量其在內田地原無增減請免丈量等語亦

屬可行餘皆諸司瑣事若概令議覆徒煩章奏爾等於朕出巡之後傳九卿詹事科道將各朝覲官奏疏同閱會議如有益於國計民生者始下所司確議否則擬旨報聞足矣九卿詹事科道既全見伊等所奏本章則將來會抵亦易知其賢否至所頒諭旨原爲察吏安民若伊等各自收藏無益其令刊刻頒發府州縣衛所使兵民一體通知不肖官員雖欲敗檢虐民亦知所忌憚不敢恣意以逞矣○議政王大臣等會議原任都統覺羅巴爾布因不渡江致誤軍機擬革職立絞籍沒家產妻及未分家子編入包衣佐領又副都統託岱宜思孝於永興河濱交戰旣不能克敵又不能固守營壘以保永興棄營奔辰州擬革職立絞籍沒家產妻及未分家子編入包衣佐領又精奇尼哈番碩塔不守吉安棄城奔回法應處死因前奉有免死效力之旨擬革職鞭一百籍沒家產本身

並妻及未分家子編入包衣佐領又原任尙書哈爾哈齊將突出吉安屯劄螺子山賊眾不能攻克擬立絞籍沒家產妻及未分家子編入包衣佐領又和碩額駙華善原任左都御史多諾不行疾救永興擬革職籍沒家產 上曰巴爾布情罪重大理宜正法但念伊伯札布海曾勦力行閒陣亡著免死發往烏喇地方託岱宜思孝著從寬免死並碩塔發往甯古塔地方哈爾哈齊之伯王喇嘛亦曾效力行閒陣亡著從寬免死並免交內務府華善雖不疾救永興但亦未嘗失利著革職免其籍沒多諾情罪與華善同著依華善例處分餘依議○兵部等衙門會議原任總兵官朱衣客不能破賊救援建昌失利敗回擬斬隨征總兵官王好文在天王廟被賊圍困因朱衣客救兵不至糧絕失守免死枷責得旨朱衣客著從寬免死給與該主爲奴餘依議○諭大學士等察議軍罪



時若將鎮守永興都統喇賽等議處似屬冤抑因係滿洲官兵故能拒守二十餘日不分晝夜保全倒壞之城伊等尙屬有功不應議罪又諭凡在永興地方及都統宜理布護軍統領哈克山被陷之處所有官員兵丁俱應寬恕爾等識之○甲申 上幸五臺山啟鑾○己丑廣西巡撫郝浴奏原任潯州府知府劉浩於逆賊孫延齡叛時抗賊不屈全家殉難應請恩卹得旨著贈太僕寺卿廕一子入監讀書○壬辰 上駐蹕五臺山○福建巡撫董國興以病乞休允之○丙申 上回鑾○丁酉贈陝西殉難西安府知事張文選衛經歷司獄周勝驥典史趙煥文官廕○是月免廣西河池州去年蟲災賦十之二

三月丁未免福建侯官等二十六州縣逋賦○戊申 上還京師

○己酉議政王大臣等會議坤巴圖魯在軍前令其開通棧道往

救漢中違約不進雖有效力功績未足相抵仍應將其一等阿思哈尼哈番及巴圖魯名並內大臣太子太保佐領俱革去 上曰此巴圖魯之名 太宗文皇帝時所賜著仍畱其世襲官職著畱一半革去一半又議原任護軍統領莽依圖統領大兵不能誅討逆賊恢復地方因有效力功績可抵應籍沒家產一半革去恩詔所得拜他喇布勒哈番 上曰莽依圖在行閒頗有勞績且伊屬下兵丁俱稱其善凡經過地方亦不擾害百姓著從寬免籍沒將恩詔所得拜他喇布勒哈番革去○庚戌諭議政王大臣等心裕素行懶惰屢次空班朕交與伊親兄索額圖議處乃止議罰俸一年又法保係懶惰革職隨旗行走之人並不思效力贖罪在外校射爲樂索額圖亦不教訓且索額圖巨富通國莫及朕以其驕縱時加戒飭並不悛改在朝諸大臣無不懼之者索額圖心裕法保

科爾琨著嚴加議處具奏尋議政王大臣等議覆索額圖應革去  
議政大臣太子太傅內大臣佐領心裕應革去鑾儀使佐領其所  
襲伯爵與應襲之人承襲法保應革去太子太保公爵不准承襲  
科爾琨應鞭一百不准折贖得旨索額圖著仍留佐領心裕著仍  
留伯爵罰俸一年餘依議○遣噶爾圖瓦禮祜等閱視遼河及伊  
爾門河以通軍餉置伊屯口倉○議政王大臣等會議宗室公瓦  
山在長沙與賊交戰不能取勝遂爾退回擬革公爵又太子太保  
都統公倭赫用雲梯往攻長沙城時抵賊鹿角挨牌不能攻破遂  
爾退回擬革職 上曰瓦山才具甚優況其公爵乃伊父願爾瑪  
渾貝子效力年久恩賜之爵著革去宗人府右宗人從寬留其公  
爵倭赫爲人尙優其所襲公爵原係其祖之職卽革去亦應子弟  
承襲著從寬留其都統公爵革去太子太保又議原任都統覺羅

畫特在石匣地方交戰不曾收取官兵骸骨並失礮位擬革職籍沒家產編入包衣佐領又原任精奇尼哈番署副都統穆承格在藤縣不能禦賊未曾收取官兵骸骨擬革職籍沒家產編入包衣佐領 上曰覺羅畫特失誤軍機甚多無甚效力之處理應依議但係覺羅編入包衣佐領爲奴似屬不便著免其編入包衣佐領穆承格亦著從寬免其編入○辛亥調色赫爲吏部右侍郎由盛京戶部○乙卯 上御乾清宮講官進講易經萃卦講章中有六二惟有中德其忠君報主之念出於至誠未嘗稍變初志故能薦賢爲國而誠可格君等語 上首肯良久曰所講極是人惟不忘其初心始終克盡忠愛乃爲人臣之善道講官牛紐陳廷敬等奏曰誠如 聖諭○丙辰以莽色爲盛京戶部侍郎由左副都御史遷○以金鉉爲福建巡撫由督補右侍郎遷○贈雲南殉難按察使李興元官廕○江

南江西總督于成龍等奏江蘇布政使丁思孔歷任既久因多參罰既不敢違例以入卓異之列又不敢拘例以蹈蔽賢之愆請破格獎勵得旨丁思孔供職勤慎著准爲卓異○丁巳復設廣西蒼梧守道一管轄桂平梧州三府右江巡道一管轄柳慶田三府○戊午議政王大臣等會議提督孫思克凡事不加詳審搖惑進剿軍心種種巧飾虛誕具奏應將三等阿思哈尼哈番及提督總兵官盡行革去 上曰孫思克身任封疆不思速滅賊寇當進兵之際種種造言搖惑軍心妄行入奏理應從重議處但聞其頗善養兵且有微勞伊所有阿思哈尼哈番及提督銜著革去仍畱總兵任

○辛酉復設直隸阜平縣知縣典史教諭各一○癸亥 上幸南

苑行圍○調熊一瀟爲督捕右侍郎

由刑部調

○甲子諭刑部國家設

立問刑衙門期於明罰敕法弼教化民必審鞠精詳讞決平允而

後民情悅服冤抑畢伸近見爾部審理大小事件每多草率因循  
贖徇舛錯全無振刷省改如聽訟之時兩造是非自應分別定案  
因意有偏私往往不問曲直勒令和息或徇繳原狀含糊完結以  
致奸頑倖免良善含冤又如入官財物奉差籍沒官員不能廉潔  
自持據實冊報乃恣意侵盜竟飽私囊貪黷成風醫不畏罪殊非  
人臣奉公守法之誼至於審事官員膠執己見聽斷不公或更改  
口詞圖遂私意或恐嚇犯證不令直供或妄肆株連稽延日月或  
怠玩疏忽苟且告竣此等弊端種種難以枚舉嗣後堂司各官俱  
著洗心滌慮痛改前非一切刑名事務必令情法允協無枉無縱  
恪遵法紀持廉秉公以副委任之意又傳諭前朕知工部情弊逐  
一釐剔今少覺整理爾刑部弊端朕無不悉知嗣後永行改革則  
已儻仍因循如故將爾等弊端摘發一事毋望倖免亦毋望止於

罷斥已也伊等又每云身為堂官筆帖式胥吏所作弊端焉能悉知止因才力不及未能察出伊等暨禪塔海豈非筆帖式出身乎斷難以不知情弊為辭朕時加諮訪諸事尙且知覺伊等諉為不知可乎朕已洞鑒故爾申飭務將夙弊盡行除革毋忽○乙丑以雅思哈為左副都御史

由甘肅布政使遷

○貴州貴西道楊大鯤奏貴州

平大黔威四府原係永西一隅吳逆務張其功設立四府並設流知府通判經歷各四員及三鎮一協其實民少官多請將四府酌改二府其糧差各務仍設土官分掌至協鎮官兵亦行裁併量留二鎮得旨著差兵部侍郎庫勒納會同該督撫提督一併議奏○丁卯福建提督施琅奏進剿臺灣選派水陸官兵已足辦賊平陽總兵官朱天貴所部之兵似不必更畱福建虛糜糧餉請發回原汛議政王大臣議如所請得旨提督施琅進剿臺灣深入海島朱

天貴及原帶官兵仍畱福建在後策應聽施琅調遣○己巳諭差往貴州酌議土司事宜兵部侍郎庫勒納等曩時逆賊吳三桂見土司富厚因起兵收服之今旣歸順議者往往不同或云土司係外夷卽令土官管理易於行事不可遂取其地或云土司與以大職令其管理事務恐有權柄不爲我節制或云我所取之地何復令彼管理仍取之爲便或云設流官管理可多得錢糧朕思土司地方止有大定黔西威甯平遠四府錢糧亦不甚多今遣爾等前往務善爲區處使可永遠遵行爾等卽定議來覆毋得游移兩可○議政王大臣等議正黃旗蒙古都統穆占行聞情罪應卽行處絞籍沒家產 上曰穆占在保甯詭稱糧米已經運到在秦州交戰時不臨陣指揮遠立觀望在辰州推諉不救永興以此坐罪固宜但伊勞績約有二百六十處他人勞績四五十處尙行抵罪伊



有如許勞績獨不可相抵乎這所議稍過著再議尋議覆穆占應革去都統阿達哈哈番籍沒家產妻及未分家子交內務府得旨著革職餘俱從寬免○以簡親王喇布弟雅布襲簡親王○庚午議政王大臣等會議原任正紅旗都統今升西安將軍希福與長沙出城拒敵之賊交戰失利應革去將軍及恩詔所得拜他喇布勒哈番至伊父所有二等阿達哈哈番仍令應襲之人承襲上曰希福勞績甚多著革去拜他喇布勒哈番從寬仍畱將軍及伊父二等阿達哈哈番又議鑲藍旗蒙古都統喇賽在永興時賊兵來犯尙未立營不能攻破應革去都統佐領上曰喇賽在永興固守甚力頗有勞績爲人亦優著革去佐領仍畱都統○以高爾位爲刑部右侍郎

由奉天府府尹遷

夏四月癸酉朔上幸玉泉山○甲戌議政王大臣等議將軍噶

爾漢既聞賊信不卽親統官兵赴房縣救援以功抵罪應革將軍免籍沒 上曰噶爾漢原因其人堪用簡授將軍著降五級畱任

○乙亥命添造京倉殿八十一座○兵部議覆左都御史禧佛奏海內大定命提鎮諸臣宜次第入覲以重闕寄 上曰在外提督總兵官等或地方緊要亦有不可離任者若俱令來朝則遠離汎地必致曠職如有應陛見者奏請候旨定奪又諭大學士等邊疆提鎮久據兵權殊非美事兵權久握心意驕縱故每致生亂常來朝見則心知敬畏如吳三桂耿精忠尙之信輩亦以不令來朝心生驕妄以致反叛此等事關繫甚大況邊陲將士惟知其統轄之主不習國家法度曩者朕曾降敕於廣西將軍馬承廕馬承廕跪受其下諸人皆驚曰我將軍亦跪人耶卽此觀之兵權不可令久擅也○兵部議覆貴州巡撫楊雍建奏平溪清浪鎮遠偏橋四衛

地土錢糧隸於湖南驛站夫馬則屬黔省以楚屬之衛弁管黔省  
之驛站甚爲不便其平清二衛原係湖南地方應將驛馬總歸湖  
南驛道管轄鎮偏二衛地土錢糧歸於黔省每年夫糧馬料卽在  
黔省撥給實爲兩便從之○丁丑諭西安將軍希福陝西地方甚  
爲緊要因爾效力行閒練習軍務特簡此任爾到西安須嚴約兵  
丁加意操演不得騷擾百姓督撫布按俱封疆重臣地方大吏乃  
有駐防防禦等官公然騎馬入伊衙門平行抗禮者大失體統儻  
知縣等官與爾將軍副都統平行爾等之意若何近見浙江福建  
將軍都統督撫彼此不睦題請坐見禮儀豈不負朕視文武一體  
之意乎又漢中地方必揀選精兵發往戍守不得以強壯兵丁畱  
留本標止以疲弱者發往爾其識之○河道總督靳輔奏蕭家渡  
合龍大溜直下七里溝等處逐漸坍塌險汛日加應行修理共有

四十餘處並黃河之天妃壩王公隄運河之一切閘座修防約需工料銀十五六萬兩查原額河道錢糧有二十六萬兩因捐除荒災止有十八萬餘兩內除夫食歲修等項止存八萬餘兩請照原額撥補務於每年三月內盡行解足則工程永固運道永通民生亦永遂矣得旨蕭家渡決口堵塞黃河大溜直下七里溝等處逐漸坍塌險工甚多關係緊要應速行修築務令隄岸堅固不致再有衝決所需銀兩著將就近見在錢糧先行動用後以河銀補項

○戊寅議政王大臣等會議都統席卜臣副都統翁愛原任副都統擴爾昆等出兵功罪 上曰席卜臣尙有勞績翁愛同大兵平雲南亦有微勞俱革職免籍沒家產擴爾昆無甚大罪陣亡可憫著議敘又議敘固山貝子章泰功查貝子以上從無議敘之例惟信郡王勦滅察哈爾曾以功績寫入冊內頒賞應否亦遵此例請

旨定奪 上命照例入冊賜黃金二十兩白金千兩○庚辰先是  
令烏喇甯古塔兵往黑龍江呼馬爾尙未啟行尋尙書伊桑阿以  
造船赴甯古塔 上命傳諭巴海兵抵黑龍江應駐何地其詳議  
以聞至是巴海等奏黑龍江呼馬爾距雅克薩城遼遠若駐兵兩  
處則勢分道阻難於防禦且過雅克薩有尼布潮等城羅刹儻水  
陸運糧增兵救援更難爲計宜乘其積儲未備速行征勦俟造船  
畢度七月初旬能抵雅克薩卽親統大兵直薄城下宣諭招撫否  
則駐紮墨克頂諸地卽遣官兵與奉命赴羅刹甲士宜番馳至雅  
克薩宣諭兼觀其形勢若何再議進止機宜令宜番一併奏聞烏  
喇官兵乘往馬匹恐長途疲羸不任馳驅索倫近墨克頂宜令選  
肥馬五百匹送呼馬爾河口酌量給用議政王大臣等議如巴海  
等所請 上諭所議進征羅刹軍務殊爲疏略烏喇甯古塔兵未

歷征戰不諳行陣紀律將軍巴海及副都統官兵又彼此不合巴海著畱守烏喇薩布素瓦禮祐及副都統領兵前往不必投爲將軍至所議七月兵到卽行攻戰亦屬未可俟抵彼相度形勢奏請可進之時京城每旗精簡五十人參以軍前獲罪人員委投夸爾大參領別遣將軍由陸路直趨五旬可達我兵至冬時攻戰乃能有濟若今冬不便克取來夏令烏喇甯古塔兵仍駐彼地或令撤回至期酌行又卽談言取馬蒙古不能卽得可選兵部上駟苑肥馬二千匹於本年七月內豫發索倫地方牧放俟禁旅到後畱其羸馬更以所備肥馬乘往其傳集卽談彭春再行確議於是議政王大臣等奏 上諭深中事宜固應祇遵但前奉暫停攻取相機舉行之旨尤爲切當烏喇甯古塔兵不須往墨克頂勘得黑龍江呼馬爾之間額蘇里地方可以藏船且有田隴舊迹卽令大兵建

立木城於此駐紮宜番回自羅利再議派京師兵或撤烏喇甯古塔兵至巴海畱守烏喇薩布素瓦禮帖統兵以行及豫備馬匹於索倫悉應遵旨額蘇里索倫村莊之間應設四驛令赴索倫理藩院大臣董其事從之○以拔錫爲甘肅布政使由鄂中選○辛巳諭戶部黔省爲滇南孔道地瘠民貧大兵凱旋輓輸芻糗供應人夫極其浩繁且起解吳逆家口絡繹運送不無苦累恐小民竭力供億生計艱難朕心深爲憫惻所有本年秋冬及來年春夏應徵地丁正項錢糧盡行蠲免以示朕軫恤民隱至意○癸未議政王大臣等會議署副都統雅哈喇在螺子山地方失利又屢經退卻擬革職立絞籍沒家產妻及未分家子交內務府又署副都統額思黑在永興地方不能擊敗迎拒之賊反率兵退回亦擬革職立絞籍沒家產妻及未分家子交內務府 上曰雅哈喇從寬免死其妻

子亦免交內務府所有二等阿達哈哈番佐領俱著革去額思黑  
從寬免死革去一等侍衛妻子一併交與內務府○乙酉 上幸  
南苑行圍○己丑禮部右侍郎富鴻基以病免○庚寅諭大學士  
等大凡貪生惡死人之常情朕見旗下僕婢往往輕生投河自縊  
必因家主責治過嚴難以度日情極勢迫使然朕心深爲憫惻應  
如何教誡此風可絕明珠奏曰此等事往日極多蒙 皇上軫念  
立法禁止邇來此風較前差息至殉葬一事多屬逼迫 皇上憐  
其無辜再四嚴禁今亦不聞有此等事矣○辛卯添設工部滿洲  
主事八筆帖式十六○壬辰鑾儀使左都督趙良棟奏臣於康熙  
十八年四月奏請進兵不十日而取徽州十一月奏請兩路進兵  
不十日而取成都奉有 上諭趙良棟若不克取成都保甯如何  
而得若不得保甯成都如何能守是保甯成都兩路官兵功勞我



皇上無不知之而部議保甯一路官兵功加十等成都一路官

兵功加一等若是懸殊伏乞照例議敘又言臣於康熙二十年九月內抵滇在總督金光祖營內會議令臣進重關下營取得勝橋翌日章泰改令蔡毓榮取得勝橋而蔡毓榮之兵在重關已十四日未能取橋二十日又公議令臣破南壩之賊取雙塔臣隨於二十二夜破南壩奪玉皇閣安營二十五夜奪新橋等處賊兵見我兵扼吭人心始亂郭壯圖自縊吳世璠自盡二十九日城開此臣親率官兵不三日而奏捷者也今蔡毓榮官兵議敘加十三等而臣下官兵直入取城竟未議敘乞敕部查敘得旨著議政王大臣等會議○癸巳 上幸玉泉山○以安徽布政使龔佳育爲太常寺卿○乙未以陳廷敬爲禮部右侍郎

由翰林院掌院學士遷

○己亥議政

王大臣等會議都統喇哈達自到浙江並不前進勦賊及降諭嚴

趣方進衢州閩省初定又不能攻破海澄縣賊眾功罪相抵應革去都統及恩詔所得拜他喇布勒哈番佐領其父兄之三等阿達哈哈番與應襲之人承襲 上曰喇哈達不能攻破海澄賊眾以致賊眾圍困海澄其後賴塔雖至亦不能救援情罪頗重但隨康親王平閩有功又歷任年久能勝都統職任且多有勞績從寬降五級畱都統任並所襲阿達哈哈番革去拜他喇布勒哈番佐領

○庚子戶部議覆山西巡撫穆爾賽奏太原大同二府屬地畝荒蕪人丁逃亡無徵錢糧二萬四千四百餘兩均請蠲免應自康熙二十一年起准其豁免三年得旨依議人民逃散皆由地方巡撫以下及有司各官平日不能撫養百姓督勸力田於常平等倉不行積穀備荒以致猝遇凶年小民失業該撫以下各官本應從重處分今姑寬免著嚴飭行○是月免湖南華容平江安鄉三縣水

災賦十之三

五月壬寅朔

上還宮

○以柯永昇爲安徽布政使

由江西按察使遷張

仲舉爲湖南布政使

由山東按察使遷

何毓秀爲四川按察使

原任山東按察使

○議政王大臣等議覆鑾儀衛使趙良棟奏攻克成都雲南省城

二次功績未經優敘兩疏查趙良棟因不急救建昌以致建昌等

處陷賊功罪相抵無庸再敘其標下官兵交與兵部仍令照例議

敘從之○丙午調張玉書爲翰林院掌院學士

由內閣學士調

○左僉都

御史陳汝器奏每旗應設一營操練火器

上曰所奏甚是漢軍

兵丁不能騎馬者甚多每旗應設一營操練火器議政王大臣等

集議以聞○戊申 上幸南苑行圍○辛亥以章欽文爲江西按

察使

由湖北糧道遷

楊大鯤爲山東按察使

由貴州貴西道遷

○癸丑以孫在豐

爲內閣學士

由翰林院侍讀學士遷

○乙卯諭大學士等部院堂官惟敬慎

廉潔方可無玷厥職今觀各部侍郎內雖辦事有才而操守不足者有之應將伊等改授武職向來副都統員缺有將侍郎改授之例自後副都統缺出可將侍郎職名一併開列朕將酌而用之○丁巳改甘肅慶陽府同知爲捕盜同知○辛酉刑部議覆直隸巡撫格爾古德奏凡賣身旗下之人仍居本地方肆行詐害應盡令歸旗如有容隱者分別多寡將地方官議處 上曰朕因旗下人雜居民地倚勢妄行欺壓百姓前于成龍格爾古德陸見時俱經面諭令其嚴察究處故格爾古德有此條奏今部議分別容隱多寡以定處分條例殊爲未當善良之人安處地方雖多亦不爲害若兇惡之徒恃強逞勢恣行不法雖一人亦爲地方之累其原有田產家口素不爲害於地方者若盡令歸旗又恐致其失業其確議以聞○壬戌 上問兵部尙書杭艾曰近議行閒情罪如何杭

女奏曰大案俱已完結見今所議皆細小情罪 上曰行閒功罪相抵難以允當卽如螺子山失利人員其後效力功績應得世職者亦有之侍郎郭丕奏曰凡行閒情罪以敗績爲重議處最嚴是以勞績多寡未行分晰 上曰螺子山石匣祖山頭等處較他處更甚若概行處分不加分晰似屬冤抑此後功過相抵務須妥確○甲子先是福建總督姚啟聖奏海賊劉國軒遣僞官黃學齋書至請照琉球高麗等外國例稱臣進貢不雜髮登岸應否如所請請旨定奪 上曰臺灣賊皆閩人不得與琉球高麗比如果悔罪雜髮歸誠該督撫等遴選賢能官前往招撫或賊聞知大兵進剿計圖緩兵亦未可料其審察確實儻機有可乘可令提督卽遵前旨進兵至是姚啟聖奏遣福州副將黃朝用往諭劉國軒等仍如前言 上乃趣施琅速進兵

六月乙亥子故盛京禮部侍郎哈爾松阿祭葬○丁丑 上幸內  
庫賜大學士勒德洪明珠李蔚王熙黃機吳正治金杯盤各一副  
段各二疋紗各三疋學士薩海等段各二疋紗各一疋詹事沈荃  
等段各一疋內閣侍讀蒼柱等紗各一疋○工部議覆河道總督  
靳輔奏康熙二十一年以前江南決口未堵上流不至壅滯今決  
口全堵除減水壩之外更無旁洩之途江南運道費如許金錢甫  
有頭緒若河南亦有疏失則前功盡棄其開封歸德兩府隄工通  
長一千餘里或照往例撥歲修人夫興築或照近例動帑金興築  
查前經原任河撫佟鳳彩具題停止派夫今應動河庫錢糧修理  
總河豫撫會同詳定務須修築堅固得旨河工關繫緊要蕭家渡  
決口築塞方完河南隄岸工程專令河南巡撫暫行署理如有應  
會同總河事情仍移文商權勿致貽誤○戊寅調伊桑阿爲吏部

尚書

由戶部調

○庚辰議政王大臣等遵旨議覆開散宗室十五歲以

上及未滿歲數無父幼子俱給以拖沙喇哈番俸至革職開散宗

室俱不准給內革退徵職章京等或貧不能度日聽其具呈宗人

府察明具奏月給銀四兩從之○癸未 上奉 太皇太后出古

北口避暑啟鑾○調杭艾爲戶部尚書

由兵部調

○以廣東嶺東守道

事務歸併嶺東巡道改爲惠潮道嶺南巡道事務歸併南韶巡道

改爲廣南韶道併肇高廉三府羅定一州於嶺西巡道改爲分巡

肇高廉羅道併雷州一府於瓊州道改爲分巡雷瓊道○甲午禮

部侍郎吳努春以買良爲奴復行掠死革職並削佐領○是月免

江西萍鄉旱災賦

閏六月戊申兵部議覆綏遠將軍雲南貴州總督蔡毓榮題參湖

廣總督董衛國不聽調度任意抗違貽誤軍機應行議罪但董衛

國奉 上指授從鎮遠間道前進殺賊恢復鎮遠府應免議、上

曰軍機最要不容稍緩董衛國能遵指授勦殺賊寇恢復鎮遠甚  
爲可嘉蔡毓榮何用題參且自恢復黔省以後蔡毓榮亦無甚勞  
績董衛國勞績甚多此直蔡毓榮妬董衛國之功故耳蔡毓榮董  
衛國俱係敵體大臣而以不聽調度遲誤軍機題參軍令至嚴若  
罪坐董衛國必罹重罰陷人於死反坐自有定例著另議尋部議  
降二級得旨蔡毓榮著削去所加五級○己酉予故內閣學士達  
岱祭葬○甲寅以安世鼎爲江西巡撫原任○戊午福建總督姚啟  
聖奏報提督施琅進勦臺灣克取澎湖○庚申諭刑部人命關繫  
重大凡見審人犯自應早取口供速行完結庶不致無辜久禁囹  
圄淹滯斃命其中有應行詳審及等候質對者或暫行監候或羈  
禁各門該管官員亦當嚴加稽察不時照管毋令獄卒及守門人



等借端需索恣行陵虐且各犯雖有應得之罪若未死於法先死於獄既非憲典亦干天和朕心尤爲不忍向來在外各衙門審理人犯或係監斃或在路物故凡一起內至三人以上者定有處分之例今思內外刑獄事屬一體嗣後在內各衙門及各門監禁人犯一起至斃幾人以上者作何處分九卿詹事科道詳議定例具奏○癸亥諭大學士等一切政事皆國計民生所關最爲重大必處置極當乃獲實效朕每詳覽章奏內有所疑或折五六本七八本咨詢爾等者務欲得至當耳今爾等不各以所見直陳一切附會迎合朕意則於事何益朕從來不憚改過惟善是從卽於乾清聽政時雖朕意已定之事但視何人之言爲是朕卽擇而行之此爾等所共知也堅執己見獨持議論之人朕素所不悅觀今之大臣甚不如昔之大臣今之政事亦甚不如昔日部院無事無弊大

臣無人無私外間之弊較內更多朕知之久矣欲嚴治之則其人甚多難於盡處所以朕數年來屢下嚴旨加意別釐今雖較前差善而弊常未除且部院堂官止圖己身安逸辦事不勤堂官推諉司官司官推諉筆帖式早歸私家詭稱終日在署此何理也阿蘭泰奏曰臣等蒙 皇上拔用惟是識見淺陋不達事體如果確有所見敢不陳諸 皇上之前 上曰爾等俱自筆帖式遞遷爲大僚云不達事體可乎但恐開罪於人故緘默不言耳聞爾衙門滿洲大學士等每當票擬及與學士議事時某某如此票擬某某如此持論惟恐爾衙門中書輩漏洩致部院大臣懷憾漢大臣亦然內閣最爲機要之地爾等亦議政之臣宜各抒胸臆直言無隱但求事當於理互相商酌卽小有得失亦復何傷朕焉有因議事而加罪者乎且人資稟不齊不可云事事盡知此人所知而彼不知

者有之彼所不知而此或知者亦有之譬如京官不知外州縣之事八旗人員惟知本旗之事不知別旗之事必云彼盡知之己所知者置而不言不可也爾等其益勉之○以白應科爲雲南按察使由陝西臨洮道遷○甲子 上奉 皇太后駐蹕拜察○己巳以王定

國爲湖廣布政使

由安徽按察使遷

○福建水師提督施琅奏報臺灣逆

賊劉國軒知臣等將乘南風進剿傾巢而來堅守澎湖凡沿海之處小船可以登岸者盡築短牆安置腰銃臣總統舟師於六月十六日進發署右營遊擊藍理等以烏船首先攻敵時值潮水正發前鋒數船被賊圍困臣親駕船衝入殺退賊艘興化鎮臣吳英繼後夾攻焚殺僞將軍沈誠等大小賊目七十餘員賊兵三千餘名十八日進取虎井桶盤嶼二十二日遣總兵官陳蟒魏明等領船五十隻爲奇兵直入雞籠嶼四角山夾攻又遣隨征總兵官董義

康玉等駕船五十隻爲疑兵直入牛心灣牽制又將大烏船五十  
六隻居中分爲八隊每隊駕船七隻各作三疊畱船八十隻爲後  
援臣指揮督率直進撲勦賊船齊出迎戰總兵林賢朱天貴等繼  
進夾擊自辰至申我師奮不顧身勦力殺賊擊沈大小賊船一百  
九十四隻焚殺僞官三百餘員賊兵一萬二千有奇劉國軒力不  
能支乘快船從吼門潛遁僞將軍楊德等一百六十五員率賊兵  
四千八百餘名倒戈投降是役也以七日夜破數十年盤踞之賊  
抵澎之後海不揚波進師之時潮漲四尺以佐成功此皆 皇上  
天威所致至各將士勦力用命督臣姚啟聖親來廈門餉運不匱  
併請議敘又總兵官朱天貴遊擊趙邦試陣亡亦請優卹得旨據  
奏總統舟師分配將士將年久盤踞海逆深入進勦屢次擊敗賊  
眾斬殺甚多燒毀打沈賊船克取澎湖招降僞官兵丁得獲礮位

等項具見卿籌畫周詳調度有方官兵奮勇攻拔海洋險要重地  
深爲可嘉在事有功人員從優議敘姚啟聖親至廈門彈壓殫心  
催餉糧運鼓勵將士克奏捷功亦從優敘朱天貴等從優議卹

東華錄

臣王先謙敬

臣周澗蕃恭校

秋七月庚午朔 上奉 太皇太后自拜察回鑾○辛未 上召

科爾沁達爾漢親王額駙班第阿祿科爾沁多羅郡王額駙色楞  
翁牛特多羅杜楞郡王畢禮袞達賴喀喇沁多羅杜楞郡王札什  
及公台吉官兵等諭曰人生以道理爲重人爲情慾所牽恣意妄  
爲以致喪身者皆由不明道理故耳朕見其無知陷罪甚爲憫惻  
卽今阿祿科爾沁翁牛特二旗盜賊甚衆爲盜賊而致富者能有  
幾人身受惡名被獲則死凡貧富皆由天命違理妄求能必得乎  
爾等若遵法守分有一二牲畜者擇水草善地畜牧能耕田者勤  
於耕種則各得生理天亦佑之如此豈不善乎儻有貧困至極無

以聊生者該管之主宜加撫恤使之得所坐視其迫於飢寒以致  
離散爾等之心何安朕本內外一視並無分別爾外國遇年歲荒  
歉朕卽運糧米賑濟或有困乏卽賜牲畜段匹無非慮爾等失所  
之意況此番巡幸爾等或有過犯朕並不執法治罪且頻加賞賚  
優待爾等於此可見嗣後爾等宜遵守教諭革除惡習以副朕好  
生之意額駙班第等奏曰 皇上憐憫訓誡臣等惟有銘刻肺腑  
竭力遵行眾官兵俱鼓舞踊躍合詞奏曰 皇上聖明於我等生  
理歷歷洞悉此後我等當盡改前非共遵國法以無負 皇上聖  
心也○己卯 上奏 皇太后書曰臣隨侍 聖祖母臨幸烏喇  
岱興安拜察地方朝夕欣奉 慈顏今已回鑾將至京師但還宮  
日期未便豫定凡所經過皆大山茂林並無土產佳物惟畋獵所  
獲鹿尾鹿脯因時當盛暑醃曬成乾曾經進奉未知到日其味何

如蒙加餐否臣自拜違漸及兩月欲表思念 聖母之心將臣烏

槍所得鹿尾親手法製併揀榛令坐塘筆帖式等馳送伏冀垂鑒

少賜匕箸○甲申理藩院奏鄂爾多斯貝勒松阿喇布等報稱厄

魯特巴圖爾濟農於黃河崖駐牧議遣司官二員諭使歸部 上

諭學士等此事朕知其故初厄魯特鄂齊爾圖汗爲噶爾丹博碩

克圖所殺其國被奪其子袞布喇卜坦其姪巴圖爾濟農敗遁求

達賴喇嘛指授所居之處達賴喇嘛令袞布喇卜坦住居阿喇克

山自此遂居彼地先是巴圖爾濟農於我國邊界緣邊駐牧會移

文噶爾丹博碩克圖言此乃爾厄魯特之人爾若收取則取之若

不收取我自有處置噶爾丹覆云且過來年俟後年收之今聞袞

布喇卜坦取喀爾喀土謝圖汗之女爲妻兩處互相犄角噶爾丹

博碩克圖欲以兵向袞布喇卜坦巴圖爾濟農則恐喀爾喀土謝



圖汗躡其後欲以兵向喀爾喀則恐裘布喇卜坦等躡其後蓋斷不能收取巴圖爾濟農者也且噶爾丹眾最貧苦有一馬者卽稱爲富饒勢必內生變亂此事暫留俟回京再奏○戊子以盧崇興爲安徽按察使由湖北武昌道遷○壬辰 皇子生周歲薨未命名○癸

巳廣西巡撫郝浴奏投誠安南國都統使莫敬光等併帶來家眷先經奉旨發回安南國安插除莫敬光續經病故族眷百姓陸續逃故外共計三百五十名口於本年五月二十四日押出南關交該國差員申公才等領回安插下部知之○甲午 上奉 太皇

太后還京師○乙未以薩海爲禮部右侍郎由內閣學士遷○吏部奏正

一真人張繼宗奏請恩詔誥命及父母祭葬查正一真人故從無賜卹致祭之例應不准行其恩詔誥命應如所請得旨張繼宗見號真人卽著照所襲銜名給與誥命一切僧道原不可過於優崇

若一時優崇日後漸加縱肆或別致妄爲爾等識之○丙申海逆鄭克塽遣僞官鄭平英等齎降表至提督施琅軍前總督姚啟聖轉奏請頒赦招撫 上命撰敕發姚啟聖同施琅酌行敕曰 皇帝敕諭鄭克塽劉國軒馮錫范等帝王撫御寰區仁覆無外卽海隅日出之邦無不欲其咸登衽席共享昇平爾祖父自明季以來出沒海洋盤踞巒嶼本朝定閩之後爾祖鄭成功竊據一隅甘外王化以及爾父鄭錦苟延歲月假息偷生勾引奸徒窺伺內地屢經剿撫仍執迷不悟頑梗怙終至爾年方童穉惑於黨類之言妄思效爾前人竄伏臺灣恃爲窟穴倚險負固飄突靡常以致沿海地方里閭不甯時遭兵燹之厄朕念中外兵民皆屬赤子何忍聽其久罹兵災不加拯救故特命提督施琅選將練兵整飭戰艦揚帆進剿直入大洋旋據奏報已克澎湖爾抗拒大兵者殲滅殆盡

餘眾敗遁臺灣。目今舟師進剿，指日蕩平。近據總督姚啟聖奏，爾等具奏請降，又據來使呈乞恩赦朕體上天好生之心，薄海內外，率俾安全。特頒敕旨，前往開諭。爾等果能悔過投誠，傾心向化，率所屬偽官軍民人等，悉行登岸。將爾等從前抗違之罪，盡行赦免。仍從優敘錄，加恩安插。務令得所。煌煌諭旨，炳如日星。朕不食言。儻仍懷疑畏，猶豫遷延，大兵一至，難免鋒鏑之危，傾滅身家。噬臍莫及。爾等其審圖順逆，善計保全。以副朕宥罪施仁至意。○丁酉，贈澎湖陣亡左都督平陽總兵官朱天貴太子少保准一子爲廕生。○戊戌，以麻爾圖爲內閣學士。由陝西布政使遷○出使厄魯特內大臣奇塔特等還奏，臣等於十二月二十八日至噶爾丹所居帷幕，噶爾丹跪受敕書及賞賚諸物，隨請皇上起居，臣等答曰：皇上萬安。旣坐，噶爾丹問曰：聞中國有寇賊，今已平定，信乎？臣等

答曰比年會有寇盜竊發我皇上仁慈恐用兵擾民故漸次收服者有之剿滅者有之今已盡皆底定矣正月初九日臣等召其車臣寨桑吳爾占扎卜以部發查訊厄爾德尼和碩齊巴圖爾額爾克濟農之文授之曰此項事情先已檄行兩次並無回文故因我等此來之便令定議如厄爾德尼和碩齊巴圖爾額爾克濟農係爾屬下人當限日收捕照例治罪齋罰贖送部若非爾屬下人或不能收捕我朝另有裁奪車臣寨桑等來覆曰我汗言前所行兩檄第以爲部文所以未答旣係聖旨敢不以覆厄爾德尼和碩齊巴圖爾額爾克濟農皆我所屬此二人已歸達賴喇嘛我當遣人往召之儻如命而至我治其罪若復他遁則無如彼何也臣等令彼約期以丑年四月臣等曰厄爾德尼和碩齊等向來邊境作亂但念汝等職貢年久所以姑待今約期遠其聞未必不又作

亂也彼稱噶爾丹之言曰其閒或又作亂惟上處分臣等又問

去年七月有稱爲汝汗之姪丹津鄂木布之使者並無符驗前來  
進貢汝處何項人等給之符驗何項人等不給符驗彼復稱噶爾  
丹之言曰我遣使請安進貢必有印文至我屬下之人各處貿易  
潛至中國冒稱我使亦未可定自今以後我若遣使當用印文開  
註年月日期正月二十七日臣等起行噶爾丹博碩克圖汗遣其  
額爾克格隆察漢溫卜盆楚克等四人貢馬四百匹橐駝六十頭  
貂皮三百銀鼠五百猓狨孫皮三張沙狐皮一百黃狐皮二十活  
雕一隻貼金牛皮五張厄魯特烏槍四桿隨臣等來謝恩奇塔特  
等又疏奏曰臣等去年十二月初至噶爾丹地方有歸化城都統  
古睦德所屬班達爾善之子巴朗來投臣等告曰我  
康熙十八  
年正月自歸化城歸途遇厄魯特所使阿卜都拉額兒寨桑同

入貢之格楚爾者將我細縛帶至此地今聞大人至此特來相投  
臣等召其車臣寨桑等問之車臣寨桑來覆我汗言我國一切罪  
犯從無殺之之例可罰格楚爾以五十九牲畜乞諸大人稍候帶  
歸臣等言我等奉差頒恩賞而來並非來取罰贖不便等候俟有  
貢使之便將罰贖附解得旨令議政王大臣等逐一詳議尋議政  
王大臣等議噶爾丹博碩克圖汗累代進貢往來通好今將敕書  
賞物照彼蒙古禮接受恭請 聖安又稱嗣後遣使俱給用印符  
驗填註年月日期應無庸議其厄爾德尼和碩齊等事約以丑年  
四月爲期約期之內如仍復作亂悉聽 皇上處分應俟所期之  
年再議攜回之巴朗交都統古睦德其格楚爾應俟照彼國例治  
罪將罰贖牲畜解送到日所司再議從之○己亥工部議覆總河  
靳輔大修清水潭蕭家渡等口並歲修工程共二十八本奏銷錢

糧 上曰河道關繫國計民生最爲緊要前見靳輔爲人似乎輕躁恐其難以成功今聞河流得歸故道深爲可喜以後宜嚴加勅  
瑟勿致疏防方爲盡善其各本俱依議○是月免甘肅靖遠衛旱  
災額賦

八月庚子朔諭大學士等近觀厄魯特噶爾丹博碩克圖來使較前漸多每次常至數百人聞其沿途遇邊外游牧蒙古肆行擾害外國之人若行痛懲又恐失柔遠之意彼處遣來人員當有定數不可聽其意爲多寡嗣後正使頭目酌量數人令進關口其餘人等或令在張家口外或在歸化城交易事畢應卽遣回事著議政王大臣會同確議具奏○諭講官朕每旦未明求衣坐待部院奏事奏事既畢然後入講不惟遲延晷刻亦且稽誤工夫自後於未啟奏前進講方得從容議論多所發明自是講官待漏宮門

甫辨色 上已御講筵矣○辛丑諭經筵講官等經筵關繫大典

自大學士以下九卿詹事科道俱侍班所講之書必君臣交儆上

下相成方有裨於治理向來進講俱切君身此後當兼寓訓勉臣

下之意庶使諸臣皆有儆省○以圖納爲內閣學士由詹事遷○壬寅

諭大學士等朕觀靳輔所繪黃河圖淮黃交會之處形勢頗相脗

合其河北一帶與所題本章矛盾者甚多應令工部行文總河詳

加繪圖送進其各省地圖應行文該地方官繪送兵部以備披覽

至塞外地名或爲漢語所有或爲漢語所無應察明編入一統志

○癸卯議政王大臣等會議內大臣奇塔特奉差頒賞蒙古擅娶

寨桑之女爲妻辱罵博碩克圖汗箭射引導之人乘醉刃刺其弟

諸罪論死得旨奇塔特從寬免死減等發落○戊申以哈占爲兵

部尙書由四川陝西總督遷○己酉刑部題發掘故明廢藩墓盜案·上諭



大學士等部議照盜發常人墳墓律擬絞盜發藩王等墳墓何得與平人一例凡歷朝俱應稱某代必稱故明深覺未當以後本章凡故明廢藩宇樣應悉除之其盜發墳墓與撥人看守之處九卿詹事科道議奏○辛亥 上御經筵○刑部議覆正藍旗副都統孫塔哈與都統俄托渾爭論詬詈孫塔哈應革去阿思哈尼哈番副都統佐領鞭責副都統方額應革去加一級仍降一級調用參領勞代等各降二級調用 上曰凡事必各出己見互相論辯則是非方明情理可得若止爲首之人獨理事務更無他人與之爭辯豈有不致錯誤者乎副都統與都統乃敵體共理之官非屬官比也今因一爭詈之事坐孫塔哈如此重罪自此以後爲副都統者又誰敢與都統折辯卽如部院衙門之事止有尙書立議侍郎知其非而緘默不言可乎孫塔哈人尙可用在軍前頗有效力之

處從寬降三級留任罰俸一年方額革去所加級留任○壬子戶部議覆山西巡撫穆爾賽巡鹽御史馬爾漢奏前撫圖克善清查鹽丁將老少病廢盡行開報迨鹽池水患仍責鹽丁修築以致力役交困里甲包賠今通計包賠一萬七千一百餘丁銀一萬五百餘兩請行豁免從之○工部給事中許承宣奏請修葺天下學宮以崇文教從之○復廣西賑濟貧生學租銀米○先是 上以八旗貧兵養贍不給命議政王大臣等會議資生之策至是議政王大臣等議旗下兵丁貧無妻室者官給貲婚娶無房室者令八旗王以下官員人等以上有房屋四十間者分撥一間給與居住無田土者以戶部所存未分撥田土撥給並丈量王以下官員人等以上戶內田土有較原數浮溢者令存留候撥 上曰所議尙未盡善每四十間撥一間如在住室牆垣之內恐有未便或別所房

屋或空地築室撥給庶不涉於強派其皇莊地土未經議及亦非公私一體之誼應令一併丈量若親王以下富戶以上有空閒園地房屋情願捐輸入官者著該部奏聞分別議敘○福建水師提督施琅奏七月十五日鄭克塽遣僞官馮錫珪等僞侯劉國軒僞伯馮錫范遣其弟僞副使劉國昌馮錫韓等齎降表文稟詣臣軍前請繳僞冊印率眾登岸以求安插臣隨遣侍衛吳啟爵筆帖式常在同馮錫珪等持榜示往臺灣曉諭僞官兵民驗視雍髮卽令鄭克塽等繕寫降表並僞冊印一併齎送以便代表至臺灣雖在海外地方千餘里戶口數十萬或棄或守伏候 上裁得旨海洋遠徼盡入版圖積年逋寇悉皆向化具見卿籌畫周詳剿撫並用克奏膚功朕心深爲嘉悅在事有功人員該部一併從優議敘餘令議政王大臣會議以聞尋議臺灣應棄應守俟鄭克塽等率眾

登岸令侍郎蘇拜與該督撫提督會同酌議具奏從之○乙卯以

席格爲陝西布政使

由郎中遷

○諭大學士等近見刑部事件延挨稽

遲不作速完結者甚多因一人犯法遺累眾人徒受縲紲之苦朕

心深爲不忍凡事雖皆有限期而一遇齋戒又復扣除齋戒雖不

用刑若尋常聽斷及審取口供有何不可如何速令完結犯人不

致苦累著九卿詹事科道會議以聞○丙辰大學士等遵旨議覆

刑部事件遇齋戒日雖不動刑仍令取供定罪以便速結 上曰

朕於刑部事件所以念念不忘者特以別部事件雖少遲延不過

牽累一二人而已不致大害若刑部事件遲延太久則正犯暨無

辜牽累者身家性命受害無窮朕念及此每爲惻然其借行提兩

造干證故意稽遲時日應作何立法盡除弊源著再議具奏又諭

刑部不獨人命大事遲延日期卽杖笞鞭責之罪亦復延挨雖都

察院及該科衙門每月稽察檔案不過虛名而已何益實事嗣後照熱審例十日內所結事件造冊奏報則事不致稽延而定罪之當否亦可盡知此等小事朕不應苛察但刑部事務漸至頽廢恐人犯無辜受害故爾頻加稽察爾等可傳諭此意令一併會議○

戊午以禧佛爲四川陝西總督

由左都御史遷

○庚申翰林院奏覆給事

中許承宣奏請刊刻

御製詩文臣等詳考經史自古帝王制作

煥然可紀者莫著於詩書嗣後西漢文最近古史稱孝文詔令有三代遺風唐宋明歷代各有刊刻帝王文集典例昭然我皇上

聖德神功卓越千古道統治法兼總百王而猶日御講筵學不倦睿思所及發揮理道迥出諸臣意表閒以手詔申誠羣下辭旨淵深同符典謨萬幾之餘留心著作或發爲文章或形諸篇什鎔鑄六經包蘊萬象爲歷代帝王所未及允宜刊刻頒布用昭典冊

之極觀文明之盛事伏乞俯允科臣之請簡發 御製詩文敕下

臣衙門鳩工鑄梓頒示中外流徽億禩得旨歷代帝王詩文俱造

詣精工堪以傳布朕萬幾餘暇留心經史雖閒有著作較之往代

自覺未能媲美本不欲遽行刊布今既援據典例懇請勉從所議

刊行○壬戌 上御乾清宮講官進講易豐卦三節彖傳講章內

云驕心一生何所不至故聖人急急惕之以憂以爲安者危之伏

也治者亂之機也 上曰此所發明極是滿招損謙受益聖人久

安長治之道止在能持滿而已牛紐等奏曰 皇上此言眞保治

之宏謨也○諭吏部凡職官宜論俸次升用若越次用之則倖得

者必多況希圖速遷者豈安常守分之人耶○調韓世琦爲四川

巡撫

由偏沅調

○癸亥以科爾坤爲左都御史

由吏部左侍郎遷

○丙寅 皇

子允禔生○丁卯 上問學士牛紐張玉書湯斌等爾所修明史

如何牛紐等奏曰嘉靖以前已纂修過半萬歷朝事迹甚多天啟朝實錄有殘缺崇禎朝無實錄今就所有邸報編纂事蹟方可分作紀傳所以萬歷以後成書較難 上曰時代既近則瞻徇易生作史昭垂永久關係甚大務宜從公論斷爾等勉之○戊辰 上幸南苑行圍○刑部等衙門遵旨議覆歷代帝王名臣先賢墳墓令地方官不時查看儻有會被發掘者量爲修葺其發掘開棺見屍爲首者立決爲從者立絞發掘見棺爲首者立絞爲從者監候絞發掘未至棺槨爲首者監候絞爲從者充發著爲令從之○福建水師提督施琅奏臣於八月十一日率領官兵自澎湖進發十三日入鹿耳門至臺灣十八日鄭克塽及僞文武官俱已薙髮宣讀敕詔鄭克塽等歡呼踊躍望闕叩頭謝恩所有鄭成功之子僞輔政公鄭聰等六人鄭錦之子鄭克塽及其弟僞恭謹侯鄭克舉

等九人僞武平侯劉國軒僞忠誠伯馮錫范等子弟及明裔朱桓等十七人並續順公下官兵家口海澄公家口俱撥船配載官兵陸續護送移入內地並移咨侍郎蘇拜及督撫聽其安插其餘僞文武各官家口見在趣令起行兵丁有願入伍及歸農者聽其自便至於江浙閩粵各省被獲男婦臣仰體 皇仁已悉令回籍其冊印劄付已次第追繳倉庫人民戶口冊籍船艘軍器俱令巡海道線一信等察收下所司知之○是月免甘肅莊浪所雹災慶陽衛安化縣旱災額賦十之三

九月庚午轉色赫爲吏部左侍郎調額星格爲吏部右侍郎

由禮部調

○癸酉以丁思孔爲偏沅巡撫

由江蘇布政使遷

○丙子轉薩海爲禮部

左侍郎調鄂哈爲禮部右侍郎以佛倫爲刑部右侍郎

由內閣學士遷

○吏部奏原任雲南府知府高顯辰同知劉崐抗逆不從被賊酷刑



遣戍高顯辰服毒死劉岷在戍所始終不渝高顯辰應贈太僕寺卿廕一子入監讀書劉岷仍以原官補用從之○丁丑諭理藩院尙書阿穆瑚瑯朕統一寰區無分中外凡有人民皆吾赤子惻然憐憫皆欲使各樂其居各安其業鄂羅斯國羅刹等無端犯我索倫邊疆擾害虞人肆行搶掠隱匿根特木爾等逃人過惡甚多朕不忍卽遣大兵剿滅屢行曉諭令其自釋過愆速歸本地送還隱匿逃人前次所差彼使尼過來已經曉諭但羅刹尙執迷不悟反遣其部下人於飛牙喀奇勒前等處肆行焚掠又誘索倫打虎兒俄羅春之打貂人額提兒克等二十人入室盡行焚死此曹雖行曉諭藐不畏法因特遣將軍統兵駐守黑龍江呼馬爾等處不許羅刹仍前恣意妄行遇卽擒殺頃者羅刹諸人經過黑龍江地方遇我將卒降其三十餘人奏至朕體好生之德未戮一人皆加象

養使各得其所今雅克薩尼布潮羅剎等若改前過將根特木爾等逃人送來急回本地則兩相無事於彼爲益不淺儻猶執迷不悟留我邊疆彼時必致天討難免誅罰如路遠難歸傾心投誠者朕亦納之必加恩恤使各得其所爾院卽遵旨明白具文遣招降羅剎內尼番米海羅莫羅對執書曉諭彼有何言令其回奏○戊寅諭吏部兵部向來海寇竄踞臺灣出沒島嶼窺伺內地擾害生民雖屢經剿撫餘孽猶存沿海地方烽煙時警邇者黔滇底定逆賊削平惟海外一隅尙梗王化爰以進剿方畧咨詢廷議咸謂海洋險遠風濤莫測長驅制勝難計萬全朕念海氛未靖則沿海居民勿獲休息特簡施琅爲福建水師提督前往相度機宜整兵進征該提督忠勇性成韜鈴夙裕兼能洞悉海外形勢力任剋期可奏蕩平遂訓練水師整頓戰艦揚帆冒險直抵澎湖鏖戰力攻大

敗賊眾克取要地立奏膚功餘眾潰遁臺灣懾服兵威乞降請命已經納土登岸聽候安插自明朝以來逋誅積寇始克殄除濱海遠疆自茲甯謐此皆該提督矢心報國大展壯猷籌畫周詳布置允當建茲偉伐宜沛殊恩施琅著加授靖海將軍封爲靖海侯世襲罔替以示酬庸前進剿雲南官員會各加一級兵丁賞賚一次頃因該提督所統官兵出海進剿勤勞堪念已經照雲南例加級賞賚復思官兵遠抵海疆冒險剿寇非滇黔陸路用兵可比著再各加一級兵丁再賞賚一次以示特加優渥至意○己卯 上奉

太皇太后啟鑿幸五臺山○予故吏部尚書郝惟訥祭葬諡恭

定○庚辰以席特納爲內閣學士

由左通政遷

○壬午福建巡撫金鉉

題參屬官七員

上諭學士等總督巡撫一到地方卽題參屬員

甚多及到任既久反無糾劾官員賢否必須日久體訪方能悉知

其入境卽參無非欲屬員畏己之意積習相沿殊爲未當爾等識之○癸未敕諭厄魯特噶爾丹聲教旣一以來爾歷世相承虔修職貢聘問有年朕嘉爾盡心敬順往來不絕俱准放入邊關前此來使無多且頭目人等善於約束是以並無妄行作亂者比年爾處使來或千餘人或數千人連綿不絕沿途搶奪塞外蒙古馬匹牲畜任意放牧牲畜踐食田禾細縛平民搶掠財物妄行者甚多邊外蒙古與內地百姓非不能相拒報復止以懍遵朕之法度耳朕俯念爾等素行恭順不將若輩照內地律例究處遂至妄行殃民日以益眾用是限定數目放入邊關嗣後爾處所遣貢使有印驗者限二百名以內放入邊關其餘俱令在張家口歸化城等處貿易其向來不用爾處印驗另行納貢之厄魯特噶爾馬戴青和碩齊和碩特之博洛庫濟台吉杜爾伯特之阿爾達爾台吉圖爾

古特之阿玉奇台吉等所遣貢使放入邊關者亦不許過二百人爾噶爾丹博碩克圖汗尙無違朕視四海一家中外一體至意敬慎遵行嗣後遣使必選賢能頭目嚴行約束若仍前沿途搶掠殃民作亂卽依本朝律例傷人者以傷人之罪罪之盜劫人財物者以盜劫之罪罪之特此先行曉諭爾其知之○丁亥以王業興爲四川按察使由甘肅平慶道遷○戊子 上途次遇村民負米豆等物詢之云備臨幸之用隨傳諭學士阿蘭泰曰 太皇太后駕臨五臺一切應用之物皆出內帑豫備原無絲毫取給小民此所備物件何處應用可察明具奏隨詢五臺縣知縣繼晉及村民等皆云五臺地方偏僻恐 太皇太后駕到物用不敷故給價小民令豫備以待用原非出於科派 上曰因公事豫備可免究處但云知縣曾經給價未可深信今一切物用內廷旣備此後 太皇太后駕

臨俱不必再行齋送可傳諭直隸山東沿途居民知之○辛卯

上自龍泉關行二十里迎 太皇太后聖駕請安畢隨行抵龍泉

關 上以長城嶺雖經修治而地勢阻絕恐 鑾輿登陟維艱特

赴長城嶺用輦親試每至斗峻處步履欹側不能徑上 上還奏

明 太皇太后 太皇太后曰予以積誠瞻禮五臺今行至此遽

爾中止予心未安明日至長城嶺如萬不能登可再酌行止於是

上諭校尉及隨侍內監等務勤加演習小心扈行○壬辰 上

詣 太皇太后行宮候 駕發隨行至長城嶺 上侍左右親督

校尉及隨從人等前後扶行歷嶺路數盤山勢巉嶮險隘殊甚

太皇太后回嶺路實險予及此而止積誠已盡五臺諸寺應行虔

禮者 皇帝代我行之猶我親詣諸佛前也 上下馬謹受 太

皇太后命遂躬導 鑾輿還龍泉關仍命裕親王福全扈 太皇

太后聖駕前發○諭工部明歲甲子年一切工程俱宜停止○癸巳發白金三百兩棉四百斤命山西巡撫穆爾賽分給所過地方貧民○甲午 上承 太皇太后慈諭代禮諸寺○乙未 上回鑾駐龍泉關○戶部議覆羅剎歸順人機里郭禮等應交與正白旗編入佐領下 上曰羅剎歸順人頗多應令編爲一佐領令其彼此相依庶有資藉○是月免山東新城縣水災賦之十三免甯夏平羅所水埒田賦

冬十月己亥 上奉 太皇太后回鑾○予澎湖陣亡平陽總兵官左都督贈太子少保朱天貴祭葬諡忠壯○丙午 上奉 太皇太后還京師○丁未九卿詹事科道以海寇底定請加 尊號 上曰加上尊號典禮甚大臺灣屬海外地方無甚關繫因從未向化肆行騷擾濱海居民訖無甯日故興師進剿卽臺灣未順亦

不足爲治道之闕朕觀古來史冊盛世無屢赦之事此時雖頒赦  
加恩小民未必均霑實惠治天下之道但求平易宜民而已何用  
矜張粉飾且吳三桂剿滅後頒赦未久今又以昇平行赦殊覺太  
煩但願以平治之道圖久安長治不願煩擾多事可將此意傳諭  
九卿科道詹事知之尋大學士奏臣等遵旨傳諭諸臣諸臣言臺  
灣雖在海外乃海賊歷年占踞憑恃其險侵擾沿海居民今皇  
上指授廟略剿撫兼施海賊遂爾嚮化皇上威德加於海外自

古以來未有能及臣等非不知皇上以易簡之道治天下不尙  
粉飾惟皇上功德實越古昔帝王非加上尊號無以慰臣民  
仰戴之願上曰海賊乃癘疥之疾臺灣僅彈丸之地得之無所  
加不得無所損若上尊號頒恩詔卽入於矜張粉飾矣不必行

○戊申 皇子允祜生○子殉難陝西經略武英殿大學士莫洛



祭葬諡忠愍○以張欽文爲江蘇布政使

由江西按察使遷

○己酉以施

天裔爲廣西巡撫

由山東布政使遷

○辛亥

上御懋勤殿召大學士學

士等入酌定在京秋審情實重犯

上取各犯罪案逐一親閱再

三詳審其情罪斷無可恕者始定情實又諭人命事關重大故召

爾等入內殿共相商酌情有可原卽開生路以事繁時久賜諸臣

飯○以張汧爲貴州按察使

由陝西糧道遷

○甲寅調庫勒納爲戶部右

侍郎以阿蘭泰爲兵部右侍郎

由內閣學士遷

○乙卯調薩海爲戶部左

侍郎轉鄂哈爲禮部左侍郎調溫代爲禮部左侍郎管右侍郎事

由督捕調

○設奉天錦州二府屬各州縣教官一○丙辰左副都御史

吳瑛丁父憂命回籍守制○鑾儀使趙良棟以病乞解任命回籍

調理病痊起用○丁巳

上幸南苑行圍○庚申吏部等衙門以

尙之信名下應入官婦女爲都統賴塔帶回請取口供

上曰賴

塔自福建直抵廣東雲南係效力勤勞樹立大功之人帶回婦人

事甚微細無大關繫因此遂同眾犯一同取供覺有未當如事有

牽連應取口供爾等親詢勿因取供遂以無禮加之致失朕眷願

功臣之意○以達哈他爲兵部督捕左侍郎由左通政遷○辛酉上

御乾清宮講官進講畢上問理學之名始於宋否張玉書奏曰

天下道理具在人心無事不有宋儒講辯更加詳密耳上曰日

用常行無非此理自有理學名目而彼此辯論朕見言行不相符

者甚多終日講理學而所行之事全與其言背謬豈可謂之理學

若口雖不講而行事皆與道理脗合此卽真理學也○以阿哈達

爲內閣學士由詹事遷○以黃元驥爲山西布政使由廣西按察使遷○以孫

蘭爲江西按察使由江南廬鳳道遷○改宿桃同知爲分管宿虹河務同

知添設同知一分管桃源河務添設睢甯縣安東縣管河縣丞各

一山陽縣外河縣丞一裁高家堰大使改設主簿一〇乙丑福建提督施琅奏舟山等處僞總兵有兵丁船隻在海島者俱遣人招撫令聚集一處以杜奸宄 上曰施琅所奏招積各島船隻盡

周詳甚爲可嘉此等見在海島船隻及僞官兵丁著施琅嚴加確察俱行收撫務盡根株毋貽後患〇命吏部侍郎杜臻等往閩粵江浙勘沿海邊界招墾荒地復諸遷民業〇丙寅禮部議覆國子監祭酒王士正奏明代南北兩雍皆有十三經注疏二十一史刻板今國學所藏漫漶殘缺宜及時修補至南監板請飭該督撫查明行令學臣收貯儒學尊經閣中毋致遺失從之〇丁卯 上幸南苑行圍〇以李世昌爲雲南布政使

由湖廣按察使遷

十一月戊辰湖廣總督董衛國陛辭諭曰爾在外任二十餘年地方事宜民生利病知之已悉何待朕言第總督爲一省大吏惟

以秉公奉法潔己愛民爲要從前用兵之際未免騷擾閭閻今天  
下承平休養民力乃治道第一義何利當興何弊當革俱宜從實  
詳酌舉行惟時當承平而常若民生未遂民困未蘇則地方自然  
受福若謂地方已經甯謐不復時加體恤則所失多矣至一切事  
務本可速結者自應速結每見在外官員故意遲延致滋民累爾  
宜申飭所屬各官實心任事又在外官員行事京師無不悉知爾  
從前在任所行朕皆洞曉爾在軍中克有勞績朕卽下旨褒獎嗣  
後務加砥礪爾爲部院官已久在京部院大臣何須結納爾行事  
無疵何畏人言若行事失當雖結納大臣亦復何益董衛國奏曰  
臣惟知敬奉朝廷竇不敢與諸大臣私相交結 上曰前事不必  
復言惟嗣後實心秉公斯爲盡職耳○壬申喀爾喀土謝圖汗車  
臣汗額爾克戴青台吉墨爾根濟農各遣子弟請安入貢並口奏

云去歲蒙 皇帝諭令各牧地設立汛哨以警寇盜但我等就水草游牧居止不定難以置哨 皇上限以何處爲界請遵旨而行隨賜敕曰爾喀爾喀等向來不越爾噶爾拜瀚海之地游牧康熙三年七月內爾等越界而來朕念亂之所生皆此之故特頒敕旨曉諭爾等部下屬眾嗣後喀爾喀間有一二違禁來近境游牧以致逃盜紛紛不絕故令爾等設哨立界今爾等既稱就水草遷徙居止不定難以置哨請限以何地爲界可停其置哨限以噶爾拜瀚海爲界不得越此游牧噶爾拜瀚海之地距我邊界有三日程其瀚海盡界之東亦離我邊境三日之地不得入內朕視天下爲一體率土之人靡不撫恤我邊境地方芻牧美好朕亦知之若喀爾喀遇災旱芻草不生必不得已具奏請旨方可向內游牧俟草生時仍回原處如不請旨擅入內地卽令我邊地官兵驅逐○癸

酉先是雲南貴州總督蔡毓榮奏土司世相承襲不由選舉罔識禮義嗣後土官族屬子弟內有通曉經義志圖上進者請就郡邑一體應試至是差往區畫土司事宜侍郎庫勒納奏請如蔡毓榮言尋禮部議雲貴二省應各錄取土生二十五名其土司隸貴州者附貴陽等屬府學隸雲南者附雲南等屬府學不准科舉亦不補廩出貢從之○丁丑 上召入大學士等問曰所修明史若何李蔚奏曰草本已有大畧自萬厯以後三朝事繁而雜尙無頭緒方在參酌 上曰史書永垂後世關係甚重必據實秉公論斷得正始無偏諛之失可以傳信後世夫作文豈有一字一句不可更改者當彼此虛心互相推究卽如朕所製之文亦常有斟酌更定之處今觀翰林院所撰祭文碑文亦俱不樂改易若不稍加更定恐文章一道流於偏私矣爾等將此諭傳示修史各官知之○調

蘇拜爲禮部右侍郎

由工部調

○以趙士麟爲左副都御史

由右通政遷

○

己卯以金維藩爲廣西按察使

由廣東南韶道遷

○庚辰議政王大臣等

尙之孝隨兄尙之信反叛後復投誠授以一品官職尙乃不思自效止圖安逸前赴海州久住又躲避效力奏請欲守陵寢應革去職銜並子弟交內務府得旨尙之孝革去職銜隸旗下免交內務府○壬午以湖南布政使薛柱斗爲光祿寺卿○丙戌命改雲南省平遠黔西二府爲州○丁亥以巴錫爲工部右侍郎

由甘肅巡撫遷

○戊子以平定海寇

上親往

孝陵祭告

○庚寅

上謁孝

陵○癸巳

上巡幸邊界○改宿桃河營守備爲宿虹河營守備

增桃源河營守備一裁徐州北岸安東北岸山陽外河南岸千總

各一增山陽雲梯關外海口千總一

十二月庚子

上還次湯泉

○辛丑

上回鑾○壬寅轉陳廷敬

爲禮部左侍郎以張玉書爲禮部右侍郎

由翰林院掌院學士遷

○丙午九

卿詹事科道議覆左都御史徐元文奏外官丁憂候代其治理公事無異常日安有方寸憤亂之時而可責以政理者請自今丁憂之官無錢糧舛誤卽聽奔喪至近日士大夫鮮克由禮或衰絰婚娶或喪中聽樂或易衣從吉干謁遊玩此皆薄俗傷化宜嚴行申飭查凡丁憂官無未完錢糧盜案上司勒措遲延及服中娶妻喪服未終卽行釋服等類俱有定例處分嗣後若服內有此等行事令督撫科道指名題參從之○丁未以葉穆濟爲甘肅巡撫

由陝西按察使

○刑部議覆土司陸道清同王輔臣投誠給與總兵劄付令

招撫吳三桂復受吳三桂僞將軍職銜後在永甯勢迫投誠陸道清應立決妻妾子女給功臣家爲奴財產入官父母祖孫兄弟流徙二千里安置得旨陸道清著卽處斬其妻子財產從寬免入官



父母祖孫兄弟俱免流徙○戊申吏部議覆差往貴州料理土司事宜兵部侍郎庫勒納會同雲南貴州總督蔡毓榮奏平遠大定黔西三處原係水西宣慰司安坤所屬威甯一處原係土知府安重聖所屬自康熙四年改爲四府設立流官相安已久糧差諸務從未遲誤不便復設土官從之○庚戌調張在豐爲翰林院掌院學士由內閣調○癸丑議政王大臣等會議青海地方墨爾根台吉之來使賽桑和碩齊等陳奏伊車臣鄂木布戴青台吉在時曾於西甯等處效力有功懇請黃成爾灘地方遊牧應不准行 上曰墨爾根台吉之父雖邊疆效力有功但黃成爾灘乃邊內之地蒙古與民人生計不同斷不可容其遊牧邊內以啟後日釁端今止應酌量獎賞至不宜在內地遊牧緣由可諭彼知之○甲寅吏部奏舊例按察司員缺由布政司參政升任如無參政方以按察使司

副使升任今會推時參政副使內合例之人少難以選擇嗣後按察使員缺將參政副使參議僉事四項道員不論歷俸已滿未滿有無罰俸一體會推從之○乙卯日講易經解義成御製序文頒行天下○禮部奏元旦筵宴事宜諭議政王大臣等元旦賜宴布設滿漢筵席甚爲煩瑣每以一時宴會多殺牲畜朕心不忍自後元旦賜宴應改滿席爲漢席尋命禮部詳議酌定殺核酒醴之品悉有常制○以王鴻緒爲內閣學士由左庶子遷○丙辰刑部奏在獄病故罪囚四十餘人上諭大學士等人命關係重大無辜枉死上千天和朕念獄中犯人自作罪孽理固應死但恐死於非命會命御醫給與醫藥療治有疾之人聞今歲獄囚患病者甚多何故不將見給醫藥調治秋決之時尙不及四十餘人今乃病死若干人豈皆命耶朕心甚爲不忍此皆該部怠忽之故爾等傳刑部

堂官傳朕諭旨嚴加申飭令伊等不時親自巡視仍令該管官員加意存恤無致濫斃以副朕慎重人命至意○諭戶部陝西西安甘肅等處前當大兵征剿之時轉輸糧糗辦運芻茭一應軍需皆取給闔里小民由陸路供億勞費繁多今既經蕩平朕心特切軫念康熙二十三年應征地丁各項錢糧著蠲免三分之一以昭朕矜念民生勞苦至意又山西崞縣忻州定襄五臺代州振武衛新經地震被災頗重雖經遣官賑濟仍應量行加恩以示賑恤其被壓身故民人所有康熙二十三年應征地丁錢糧著與全免其房舍倒塌力不能修者丁銀全免地畝錢糧著免十分之四爾部速行該地方官曉諭小民務俾各霑實惠如有司官役藉端蒙混私行重徵者或經參奏或被告發將經管各官從重治罪○工部尚書朱之弼左都御史徐元文以會推湖廣按察使員缺所舉非人

各降三級調用○調施維翰爲福建總督

由浙江調

○以布喀爲陝西

按察使

由御史遷

○壬戌

上幸南苑行圍○癸亥

上還宮○是歲

朝鮮琉球來貢○人丁戶口一千九百五十二萬一千三百六十

一田地山蕩畦地五百六十一萬五千八百三十七頃六十八畝  
有奇徵銀二千六百三十九萬八百四十三兩有奇米豆麥六百  
三十五萬二千一百七十二石有奇草二百二十九萬一千五十  
四束茶十五萬九千二百一十五引行鹽四百三十五萬一千三  
百三十三引徵課銀二百七十五萬九千八百六十七兩有奇鑄  
錢二萬九千四百八十五萬一千四百八十有奇